

經
學
博
采
錄

經學博采錄卷三

南海桂文燦

曲阜桂未谷進士馥一字冬卉又字天香其先貴溪人以明初從征功世襲尼山衛百戶遂家焉乾隆戊子以優行貢成均充教習期滿補長山訓導己酉舉於鄉庚戌成進士出宰滇南永平年已五十五矣後卒於官進士負穎異之姿貫通經史博涉羣書尤潛心小學精通聲義嘗謂士不通經不足致用而訓詁不明不足以通經故自諸生以至通籍四十年間日取許氏說文與諸經之義相疏證爲說文義證五十卷薈萃羣書力窮根柢爲一生精力所在進士與段茂堂大令生同時同治說文學者以桂段並稱而兩君兩不相見書亦未見亦異事也先是屢議授梓而

未果近許印林孝廉瀚刻之淮浦陳頌南給諫云進士又繪許祭酒以下及魏濟陽江式法安唐趙郡李陽冰少溫南唐廣陵徐鉉鼎臣徐錯楚金兄弟宋吳興張有謙中元錢塘吾丘衍子行之屬爲說文統系圖大興朱笥河學士筠嘗爲之記又就官滇南追念舊聞隨筆疏記十卷以其細碎比之匠門木枰題曰札樸凡溫經二卷覽古四卷匡謬金石文字鄉里舊聞滇遊續筆各一卷嘗以槩本授山陰李柯溪少尹宏信少尹於十年後出資刻之語多精當如書洪範五福五曰考終命進士謂此與天祿永終惟永終是圖不同鄭注考成也終性命謂皆生佼好以至老也又注六極五曰惡云貌恭則容儼形美而成性以終其命容毀故惡也據鄭意謂容貌美好至老無殘毀案曾子啟

手啟足卽爲考終命子夏失明不得爲考終命孔傳謂不橫天與一曰壽何異詩闕唯左右芼之傳云芼擇也進上謂新唐書韋陟傳窮治饌羞以鳥羽擇米謂芼从毛擇物以羽毛古有此訓故毛公用之春秋左氏文十八年傳齊懿公遊于申池杜注齊南城西門名申門齊地無池惟此門左右有池進士謂爾雅十藪齊有海隅淮南云申池在海隅高誘注海隅藪史記集解引左思齊都賦注申池海濱齊藪也然則懿公所游之申池謂海隅藪也杜以爲城池失之又定九年傳衣狸製杜注製裘也進士謂裘當爲裘字之誤也哀二十七年傳陳成子救鄭及濮雨成子衣製仗戈杜注製雨衣也說文裘雨衣裘裘形似故誤也同一製字此訓雨衣彼訓裘杜氏不應矛盾後人因狸可爲

衰妄改之書中語多類此少尹在滇嘗與進士上下其議論互相商推幾共忘其刻漏云少尹亦精考證札樸中多載其語如漢書注有臣瓚水經注稱薛瓚進士謂後秦記姚襄遣參軍薛瓚使桓温當卽此人少尹按陳霆雨山墨談曰按晉中興書監和嶠嘗領命校正穆天子傳五卷瓚乃共校書官屬郎中傅瓚也後人取其說以釋漢書故有臣瓚注語此於臣字雖著實而穆天子傳文無與漢書可通薛瓚之語爲僞又青州小麥有一種早熟者俗呼火麥進士謂火當爲稞集韻青州謂麥曰稞少尹案曰永星火以正仲夏蓋仲夏之月大火見於南方正午之位今吳越間以夏令打菜子去油以滓爲餅曰火餅蘇之太湖蟹社湖洪澤湖凡夏月出魚皆曰火魚今曰火麥者亦疑初夏

耳方言燂火也郭璞曰楚語轉也皆此意也進士又有晚
學集八卷詩卷四卷進士孫樸堂秀才顯說編之道光辛
丑孔繡山舍人憲彝刻之者也集中如闕里考小穀考潔
水考明堂月令考薛君考說雉說隸宰子與田常作亂辨
書夏小正後書爾雅後與汪良庭論陽谷皆足羽翼經傳
闡明注疏進士又著詩話同席錄五十卷又著繆篆分韻
集古印文次以廣韻凡五卷以存繆篆一線云

周編修永年字書昌山東歷城人也結茅林汲泉側因稱
林汲山人編修於飲食衣服玩好一不問但喜讀書有賈
客出入故家得書輒歸編修凡積五萬卷編修見收藏家
易散有感于曹石倉及釋藏道藏作儒藏說約桂未谷進
士買田築借書園祠漢經師伏生等聚書其中招致來學

苦力屈不就生平雅慕顧亭林李榕林閻潛邱方望溪於鄉人則稱張稷若嘗與青州李文藻同修歷城縣志朱笥河學士日以詳慎後成進士欲入山治儀禮會開四庫館被徵授翰林院編修文淵閣校理時名流多集輦下往往樂與之交然深相投契者新安程晉芳魚門歸安丁杰小雅餘姚邵晉涵二雲數人而已借官書屬桂未谷進士爲四部考傭書十人夜以繼日會禁借官書遂罷編修於經史百家之言覽括略盡觀其大義不讎章句自謂文拙橐本不存桂未谷進士爲作周先生傳論曰北方學者目不見書又少師承是以無成功使先生講授借書園中當有一二後起者願吞志以歿惜哉

文粹

竊謂天下何處不然

豈特北方云爾哉使宇內得如編修者數十輩各築借書

園講授其中甲乙丙丁各盡所長後起之士自當繩繩繼繼矣輒曰乏材豈其然歟

閩縣陳恭甫編修壽祺博極羣書湛深經術所著五經異義疏證左海經辨左海文集已列入皇清經解所著尙有尙書大傳定本洪範五行傳定本三家詩考證東越儒林文苑傳左海乙集駢體文共若干卷亦工詩著有絳跼草堂詩鈔六卷俱刊別行編修之子名喬樞字美文一字樹滋以舉人出宰江西南城傳其家學尤深三家詩著有毛詩鄭箋故字說四卷博采臧玉林陳見桃惠定宇段茂堂諸家之說復蒐討羣書參考互證以申明鄭說語皆精覈其自序述編修語云鄭君箋詩其所易傳之義大抵多本之齊魯韓三家如讀素衣朱繡爲綉讀他人是愉爲偷解

麗妻爲厲王后解阮徂共爲三國此魯說也讀邠之媛也
爲援助之援讀可以樂飢爲瘵飢此韓說也以十月之交
爲夏之八月此齊說也如斯之類皆證據顯明者間有不
言其讀而但於訓釋中改其字以顯之亦有仍用其字而
但于訓釋中改其義以顯之蓋當時齊魯韓並立學官家
習戶誦故箋所采摭不煩具徵諸家而治詩者無不知之
今三家詩亡不能盡考然舉一反三足以徵信鄭君深明
於文字聲音訓詁通假之源折采微言擇善而從囊括宏
通其學之卓出諸儒者在是也編修此言誠確論也大令
所著又有齊詩遺說考魯詩遺說考韓詩遺說考共若干
卷

禹貢黑水三危自來說者多不能切指其地之所在或又

以三危爲山名壽陽祁鶴皋戶部韻士云西藏卽唐古忒
別稱土伯特凡四部曰衛曰藏曰喀木曰阿里轄城六十
餘衛在四川打箭鑪西北諺稱前藏藏在衛西南諺稱後
藏喀木在衛東南阿里極西禹貢曰導黑水至于三危衛
藏喀木統爲三危喀拉烏蘇經其地入海蒙古謂黑曰喀
拉謂水曰烏蘇在唐宋爲吐蕃元明卽烏斯藏地語見所
著皇朝藩部要略謹案烏斯之合音爲衛烏斯藏卽衛藏
見乾隆二十九年御製烏斯藏說文燦竊謂烏斯合音爲
衛烏斯合音亦與危相近古曰危今日衛衛藏卽烏斯藏
亦卽危藏也喀拉烏蘇今名怒江亦名潞江經衛藏由緬
甸入南海戶部之說洵不誣矣戶部性穎特善屬文多聞
博洽伉爽介直由翰林擢中允改戶部因公誦戍伊犁欽

定蒙古王公表傳百二十卷戶部在史館時纂修也所著
有藩部要略西陲要略西陲總統事略西域釋地萬里行
程記己庚編書史輯要珥筆集袖爽軒文集覆瓿詩集濠
池行橐西陲百詠訪山隨筆共若干卷

閩縣龔海峯郡守景瀚資質明敏少讀書日誦數千言乾
隆三十六年成進士告歸教授閩里十有四年研究經史
時務凡古今因革必窮源竟委求所以通變宜民之道及
捧檄三秦百廢具舉政聲洋溢嘉慶元年川楚賊起總戎
命郡守參軍事時督府兼四川軍事復奉命總統三省幕
府文書及四省軍務皆屬郡守擢蘭州知府郡守晝省戎
機夕治軍書夜綴奏草幾乎百函并發從軍五載馬首東
西而未嘗一夕安寢軍中所撰撫議平賊議堅壁清野議

諸篇率皆洞達治體曉暢六略大府以其法行於蜀及漢
中卒以歲事論者以郡守經世之學先幾之明上與廟算
符契非凡賢所能及也嘉慶七年冬入覲仁廟溫諭垂詢
軍事甚悉未幾疾終京邸所著有抑風說三卷祭儀考四
卷說禠二卷離騷箋四卷循化廳志稿八卷澹靜齋文集
八卷詩鈔六卷皆所手定其屬稿而未能成書者孔志禘
禘考讀書錄共若干卷藏於家皆說經者之圭臬也

侯官林薊溪孝廉嘗爲余言其鄉人有謝甸南廣文震篤
學嗜古精熟三禮性亢直交友有緩急生死以之讀史傳
百家之言必實事而求可用旁逮篆隸金石星卜形法醫
術靡不通曉乾隆乙酉舉於鄉試禮部屢黜往來河雒關
隴荆益之間匹馬踟躕周覽古來用兵形勢成敗得失輒

喟然悲咤酒酣縱談觀舉天下山川隄塞畫成地圖口若
波濤袞袞可聽乾隆末自四川歸過漢中語人曰終南巨
七百餘里連跨數郡秦蜀門戶也守險安可忽鄖庸以西
夔巫以東巴閬之北武都之南大山老林蝮蝮其間今將
吏狙承平而弛控馭不數稔難其作乎及嘉慶初邪教起
襄陽蔓延秦蜀果以南山爲巢穴朝廷於是卽山內置大
帥宿重兵改五郎營爲甯陝鎮廣文言皆驗所著有讀禮
雜記孟子年譜五經緯考櫻桃軒詩集二卷又有林崇達
孝廉茂春遂於經學讀書淵博所著有左傳補注近已散
佚又有文選補注手稿旁行斜上近爲他人所竊更名曰
文選旁證刊以行世郭象何法盛之流可深浩歎其暢圍
詩稿舊存陳恭甫先生家今向其嗣君索之亦未之見也

又閩縣有何道甫孝廉則賢質樸無華博涉羣書尤深文學所著書有讀經札記晉史補略琉球使禮服答問涉史漫筆史通何氏偶箋昭代碑傳表誌文輯名人軼事隨錄東越著述所見錄東越歷朝文輯皇朝東越文輯藍水書塾叢筆共若干卷文集八卷詩草四卷又有林梅心布衣萬春精於反切之學著有十四經集韻爲人質樸滄茂與弟菊潭友愛世稱爲二難云

長興張小軒侍郎鱗立身純潔嚴於制行主敬之學未嘗一日忘十三經義疏皆能默誦嘉慶己未進士自翰林歷國子祭酒屢轉寺閣歷禮兵工戶吏五部處常事極詳慎處疑事極嚴毅處成事極謙遜故所至無赫赫名亦不以豐功偉略自任己未會試榜未發已病猶力疾自持門啟

而卒歛之日家無餘貲士大夫奔集其喪湯敦甫協揆金
釗吳之曰人誰不死是人難得吾爲天下惜也道光壬寅
入祠閩中名宦著有誠敬堂詩文集若干卷藏於家

吳縣王亮生秀才瑩毫而好學博覽羣書窮經長於地理
著有四書地理考春秋地理考共若干卷又著有格物致
知說論語過位解越人關弓而射之解易言利涉九言利
用涉不用涉不可涉各一解四德配五行解六宗解虞書
冕服十二章解四海解禹貢滎波解鳴鴉詩說八音配八
卦解四百四十五甲子解弁服異同考聘禮記賓入門皇
升堂讓將授志趨解余皆見之語語暢達考究功深又欲
復古錢鈔之法著錢鈔初編二卷錢鈔二編一卷反覆辨
論意在必行

道州何子貞先生紹基余己酉座師也道光辛卯以優行
貢成均乙未以第一人舉於鄉丙申成進士官翰林院編
修屢掌文衡以實學取士己亥於福建得林薊溪孝廉昌
彝甲辰於貴州得傅青餘孝廉沅皆服古通經之士先生
內行出於天性處家庭間恂恂孝友其於學無所不窺藏
書數萬卷博覽而詳說之於六經子史皆有著述尤精小
學旁及金石碑版文字凡歷朝掌故無不了然於心書法
具體平原上湖周秦西漢古籍篆隸下至六朝南北碑帖
搜輯至數千餘種皆心摩手追卓然自成一家海內求書
者門如市京師爲之紙貴林薊溪嘗曰先生讀書數萬卷
下筆如潮如海胸次高曠渾穆遊其門者如坐春風之中
洵不誣也嘗著閏月定時解有云左傳言歸餘於終此古

法之疏也自漢造太初法而氣盈數虛之說始著東漢以降始初有遲速之差唐初始信之而唐一行造大衍術謂推定氣定朔以數交食推平氣以頒行憲書因定氣之法有一月兩中氣前後月無中氣之時閏無可置以爲定氣礙于置閏也歷千年至明季李天經而始破其惑天經上言置閏宜視合朔先後如本月中氣在次月合朔之前則不得置閏以此氣當屬十月之晦也此議行而定氣乃無礙於置閏是漢唐諸法所遠不逮也春秋時當得九十閏而合經傳祇八十七閏杜注於襄二十七年頓置兩閏然尙少一閏襄九年傳十二月下有閏月戊寅杜謂此年無閏當爲四五日之譌是也亦工詩所著有惜道味齋詩鈔四卷使黔草二卷先生嘗與鄞縣王獲軒大令校刊黃梨

洲宋元學案於京師多附刊大令之說極爲公允大令初名梓材後更名楚材以優貢生宰吾粵臨高縣多惠政沒於官云著有宋元學案補一百卷

光澤何願船比部秋濤字景源道光甲辰進士也學問淹洽讀書過目成誦十三經義疏皆能默識之尤深輿地之學旁搜博采裒然成帙喜蓄書積存數萬卷有異書不惜借貸典裘以易之與平定張石洲明經交明經編閩潛丘徵君年譜比部爲析疑彌罅不下數十事明經沒所著延昌地形志未成擬續成之壬子余應禮部試識比部於都門和平謙遜恂恂儒者而於刑部律例爛熟於胸同官多推重之主刑部稿日不暇給不廢著述人以爲難又聞邵武楊湘芸戶部寶臣曰比部家舊藏康熙乾隆兩朝內府

地圖比部十一二歲時心竊喜之嘗影鈔二三百紙於直
省郡縣蒙古部落西域城郭一切水道瞭如指掌云比部
嘗纂外藩蒙古俄羅斯制度物產山川風土成書八十卷
咸豐十年正月進呈賜名朔方備乘奉上諭此書於制度
沿革山川形勢考據詳明具見學有根柢何秋濤著加恩
俟補缺後以員外郎升補並著在懋勤殿行走毋庸常川
入直欽此比部可謂獲稽古之榮矣

旌德呂雲里秀才鵬飛爲江都凌仲子教授入室弟子傳
凌氏之禮學嘗以學者限於資稟苦周官全經繁富難於
卒讀因取周官中之與四書發明者別而出之以四子書
爲目證以周官經文其有一目而錯出數事者則仍從周
官之次使學者知義所統宗文雜不遞間亦取注疏之善

者附之雍其繁複取其菁英爲周禮四書互證四卷書既成教授見而避之又以鄭注諸經三禮爲先詩書最後而先後恆自相違背唐人作疏惟知疏不破注紕謬相仍後之學者茫無主適因取鄭說儀禮禮記尙書注及詩箋諸說之與周官注互異者卽以鄭氏之說較鄭氏之缺其自賈逵許慎張衡馬融孫炎薛綜陳劭干寶崔靈恩下逮近儒經說凡義涉周禮可與互相發明者亦詳錄以爲鄭氏參輔修廢起做補苴缺遺爲周禮補注六卷文法謹嚴堪擬高密其說之精者如天官膳夫王燕飲酒則爲獻主注鄭司農云燕義曰使宰夫爲獻主秀才則謂周公設官天子有宰夫又有膳夫諸侯亦有宰夫而稱膳夫爲膳宰周禮宰夫爲太宰之屬職掌較尊王燕飲酒則膳夫爲獻主

不使宰夫諸侯亦當使膳宰爲獻主文王世子公與族燕
膳宰爲主人此其證也春秋時膳宰通稱宰夫如左傳稱
膳宰屠蒯而禮記檀弓則云蕢也宰夫也左傳稱宰夫熊
膳不熟而公羊傳則云膳宰熊膳不熟是也然先鄭此注
蓋以後世膳宰宰夫互相通稱不能辨別遂誤合爲一也
又如夏官職方氏其浸潁潁注潁出陽城宜屬豫州在此
非也潁未聞地理志潁川郡陽下云陽乾山潁水所出東
至下蔡入淮過郡三行千五百里荊州浸郡國志潁川郡
昆陽有潁水注引左傳襄十六年楚公子格與晉戰于潁
阪秀才謂職方之潁與潁水相近潁出陽城潁出昆陽均
屬潁川郡則職方之潁自宜以昆陽當之與水經晉水下
所云潁水出河內軹縣西北山者有別趙氏一清合而爲

一非也全氏祖望云湛是汝水支流而潁亦與汝互相出入其說得之其所辨正多類此秀才之子名賢基字鶴田道光乙未進士由翰林轉御史直言敢諫正色立朝旬月之間由給諫鴻臚超遷侍郎可謂蒙特達之知矣亦治周官傳其家學道光二十九年刊補注於京師多爲之注語極精審如太宰以九賦歛財賄注元謂賦口率出泉也今之算泉民或謂之賦以其舊名歟賈疏漢法民年二十五已上至六十出口賦錢人百二十以爲算秀才據江慎修說謂漢之口率出泉周禮亦有之閭師言凡無職者出夫布是也此因閒民一職轉移職事不能赴公旬三日之役故使出夫布以當之猶後世之丁錢及雇役錢不可以此通釋賦字也侍郎注云謹案周制必無出口錢之事貢禹

傳云禹以爲古民無賦算口錢起武帝征伐四夷重賦于民產子三歲則出口錢故民重困至于生子輒殺宜令兒七歲去齒乃出口錢年二十乃算天子下其議令民產子七歲乃出口錢自此始禹在元帝時建議去武帝時甚近言之鑿鑿則口錢非周所有審矣又如考工記弓人筋三侷注侷猶等也秀才引釋文侷本又作牟亦作梓侍郎注云謹案旣夕禮兩杆注今文杆爲梓說文作孟云盛飯器也禮記內則云敦牟卮匭牟卽杆禮記從今文故作牟鄭云牟讀曰塋敦牟黍稷器也釋文云齊人呼土釜爲牟正義引隱義曰塋土釜也今以木爲器象土釜之形蓋杆本飲食之器以其形象土釜之牟故得牟名陶人甗實二甗甗卽釜小爾雅四區謂之釜是釜可用之以盛亦可以爲

量故牟梓亦得爲量名也其所考證多類此咸豐二年侍郎奉旨回籍團練桐城之陷侍郎捐軀殉節得旨褒嘉洵不愧家學矣

經學博采錄卷三終

經學博采錄卷四

南海桂文燦

阮文達公督粵建學海堂初擬於前明南園故址昭覺湫隘又擬於城西文瀾書院以地少風景又擬於河南海幢寺旁亦嫌近市久之始定於粵秀山麓堂中遠眺海門可見堂階南出循西下行折而東有石嶺適南至於外垣其中百竿一碧三伏時不知暑也堂後有啟秀山房居山之前故名今祠公粟主於其中堂東石嶺陂陀梅花夾道西達於山房其東最高處有亭曰至山堂名學海取何邵公語亭名至山則取揚子雲語也堂南有室爲藏書處堂之外門西向與文瀾閣外門相對閣上碧瓦朱欄與堂相輝映皇清經解板藏於此公之初命題也第一課係困學紀

聞日知錄養新錄三跋公在粵凡十八課移節雲南乃選
高才生吳應達趙均吳蘭修曾釗林伯桐張朽馬福安熊
景星爲學長額定八人分擬經史詩賦等題分閱諸卷有
缺七人公舉肄業生充補論者謂自有書院以來其法莫
善於此也

番禺張磬泉學錄杓嘉慶戊辰恩科舉人以大挑選揭陽
縣教諭改就國子監學錄秉性剛直與人豪邁自少喜爲
詩古文詞兼工漢隸娶鄧孺人不兩月而卒遂不續娶新
會富商盧觀恒嘗與從兄爭田拔其髮觀恒死子文錦以
觀恒嘗置義田立義學有功桑梓丐紳士呈請從祀鄉賢
已奉俞旨矣劉三山孝廉稔知顛末上書總督襄平蔣公
力陳不可總督以公事不當私謁還其書令具牒孝廉述

於陳仲卿秀才秀才避之於是閩屬紳士奔走相會者二百餘人嘉慶二十年夏四月聯名呈大府巡撫董公布政趙公護前欲寢其事道府以下爲承審官者皆迎意多方詰難忱以利害衆不爲動會總督被經歷李棠訐於部朝廷命大學士錢塘章公侍郎長白熙公按之因以鄉賢案付使者考問章相固趙藩之戚也意存左袒既黜觀恆祀仍以術相撓方是時三山孝廉仲卿秀才羈守南海署者五月對簿於公庭者十數番艱苦備嘗旁觀股栗學錄悉與之俱詞色嚴正言詞抗直使者研鞫月餘終不能屈卒使祀典昌明庠序無玷維持名教其功不甚偉歟學錄嘗應南雄觀州牧之聘主講道南書院一時負笈從遊者至館舍不能容會阮文達公督粵廉學錄誨人嚴正特聘以

授公子經觀州牧款留再三學錄曰吾非喜奔走公卿之門者惟阮公爲當代通儒士林碩望應聘而歸吾學當益進也此至省城授經衙齋時公子已冠昏且得恩廕將爲部郎矣學錄猶不廢夏楚其剛直如此幕中賓客多研經之士學錄自以爲經學未深乃不分晝夜研讀經疏遂得目疾後竟成瞽道光二十一年英吉利寇廣州城時高平祁恭恪督粵虛懷下士共籌防剿學錄書凡六上發憤指陳激昂慷慨讀其書猶可想見其人學錄既沒

文燦思讀

遺書而不獲甲寅冬訪諸學錄之子祖望得學錄遺藁二卷遺書盈篋旁行斜上朱墨爛然時粵東紅巾賊起連陷郡邑羊城戒嚴仍恐散佚急爲校錄編爲儀禮古今文考一卷經史筆記二卷增校尸子三卷增校漢崔實四民月

令一卷文集一卷都爲張學錄遺書八卷學錄尙有重訂
三家詩拾遺若干卷舊存其弟子梁玉臣處聞學錄校此
書時館某公署中時天寒甚侍者皆重裘學錄獨披禪衣
侍者以告始爽然添衣蓋孤詣專精不覺其寒也其說經
也但求其是而不爲墨守援據洽博持論名通閭百詩潛
邱劄記喪服翼注云余旣緣孟子而斷曰母不厭子因徧
檢儀禮禮記注疏又得五言曰祖不厭孫舅不厭婦姑不
厭婦夫不厭妾女君不厭妾若此者亦可作經讀學錄謂
君厭其妾故君在公子爲其母練冠麻衣緜緣旣葬除
之及君薨然後進而服大功喪服記傳曰何以不在五服
之中也君之所不服子亦不敢服也君之所不服者指公
子之母言也子亦不敢服者爲君之尊厭之也故大功章

傳曰先君餘尊之所厭不得過大功也厭公子卽厭公子之母也夫不厭妾之說吾不敢憑錢辛楣答問論古音轉音有以義轉者如躬之義爲身卽讀躬如身詩無過爾躬與天爲韻易震不于其躬于其鄰躬與鄰韻非謂眞先之字盡可合於東鍾也學錄則謂詩我躬不閱表記作我今不閱今躬聲相近疑詩易皆讀躬如今音與天鄰爲韻爾雅釋詁如謀也邵氏正義云如通作茹周頌臣工云來咨來茹邶風柏舟不可以茹鄭箋俱云茹度也度卽爲謀故釋言又云茹度也學錄則謂廣雅釋言如均也周禮司稼掌均萬民之食鄭注均謂度其多少是如有謀義似不必讀爲茹其他論說多類此學錄又嘗語梁玉臣曰天下有至寶之書不可不讀請之則經典釋文也玉臣名國珍番

馮人治經典釋文尤深於毛詩韓詩之學道光十二年程
春海侍郎典試來粵素間曾勉士學正深於經學並讀所
著詩毛鄭異同辨喜其釋詩定之方中以爲且中之說欲
羅致之以魁多士次場以六月食鬱及莫七月烹葵及菽
八月剝棗命題以覘其用鄭箋謀男功之說三場以經書
天文爲第一策題因問定之方中以覘學正之對是歲學
正丁艱未與試比得玉臣次場卷其詩經文破題第二語
正用箋說決其爲學正之卷而策中之說不合故允售而
稍抑之玉臣入都嘗於蘇市得惠定宇手寫周易述注並
疏稿本曾三易稿玉臣珍秘藏之後玉臣成進士爲內閣
中書舍人久居京師收羅經學之書不下萬卷斐然有著
述之意秉性謙退所作不輕示人後以病沒中途遺書莫

知所在云

新會縣在廣州西南劉宋永初元年置新會郡隋平陳廢
爲縣又改爲岡州趙宋祥興初帝昺立於岡州厓山忠義
昭千古之臣節江門理學爲一代之儒宗自明以來懷景
炎之君臣不絕於口衍白沙之學派不乏其人尙已惟是
漸尙空疎徒滋辨論則其失也近日喜以漢儒之訓詁說
經不蹈空誣之習者以文燦所知得一人焉曰陳逢伯子
驥余己酉同年友也經義亟爲座師道州何子貞先生所
賞一試春官遂不復出不榮於官授徒自給以惠定宇周
易述所說易義多未盡善欲別爲李鼎祚周易集解義疏
云咸豐甲寅之春余以紅巾將亂避地於江門偕君步至
白沙揖文恭之繪像瞻楚雲之舊臺興懷時事感慨係之

西蜀自漢文翁而後文學已開舍人爲爾雅之注

經典釋文敘錄

爾雅魏馬文學注三卷一云魏爲郡文學卒史臣舍人漢

武帝時李善注竹汀云廣韻有舍姓蓋其姓舍名人孫詒

穀曰錢謙益未必然也李善文選羽獵賦注引郭舍人爾雅

注是其人姓郭爾漢書東方朔傳有幸倡郭舍人正值漢

武帝時豈即其人耶蓋本魏爲郡文學子雲有方言之輯

卒使爾人爲舍人也名則不可考矣

至宋而眉山蘇氏子瞻易傳不襲元風多切人事書傳於

治亂興亡抉擇明切子由詩傳以序爲本又以其時經傳

並廢特作春秋集傳以矯之以左氏爲主有不可通乃取

公穀下及啖趙此皆切實之學不蹈虛誣非荒經蔑古者

所可同日語也近日以毛詩鄭箋說詩者以文燦所聞得

一人焉曰王海樓大令劼原名暉吉一字雲田四川巴縣

人嘉慶癸酉舉於鄉出宰浙江金華西安等縣因濫刑斃

命部議降調不准捐復原官降捐縣丞改發江西因隄工

文燦三集卷四

出力保舉以知縣升用部駁不准大令因在都察院呈控
吏議不公有賞不及功罰浮於罪之語經部奏請欽派大
員查核以所控不實議降四級調用所著有毛詩訓纂若
千卷語多精確凌筱南云亦工詩王蘭汀大使嘗見之
武進張皋文編修之授經弟子好學而不永年者有二人
曰金安甫曰金朗甫安甫名承之徽州歙縣人也年十四
從編修學時文讀江慎修鄉黨圖考奮然請治經受鄭氏
禮記日夜誦習旁及他鄭氏書先漢諸儒說考校推究往
往通大義時編修館於歙之江邨方次虔氏易凡所著虔
氏義九卷消息二卷禮二卷事二卷候一卷鄭荀易緯略
義各三卷皆安甫手寫之並受其義每寫一卷輒講解之
書成安甫悉能指說益爲編修校其不合者數十事時編

修所居爲橙陽山門前有小池夫渠盈焉五六月間每日將入安甫與編修之甥董士錫年相若相善並受易各手一冊坐池上解說風從林際來花葉之氣掩冉振發至足樂云後士錫歸常州學不能竟安甫從編修至浙又至京師更受儀禮讀未竟以嘉慶五年正月朔日病死年十有八安甫於世事無所嗜獨好治經於世之人無所悅獨好編修唯編修言是從飲食起居必編修依誓去編修皇皇無所稅其遊京師也編修不忍沮之其父母亦不忍拂之其治經唯好鄭氏疾非鄭者如讐嘗寫後漢書鄭康成傳而次其年譜繫之以文悠然有千載之思每欲著書編修嘗戒之卒之後編修檢其錄有曰周易爻義曰儀禮名物皆無書鄭氏詩譜虞氏易變表略已具未就編修取其易

表定爲二篇附於所著消息之後而錄其條於各書者次爲一卷序而錄之爲安甫遺學三卷庶以存其大凡云金朗甫亦歛人編修治易於虞氏義條理縝密朗甫盡通之爲之補正旁通年二十許卒編修序錄其遺書與安甫所著書合刻之

練童子伯穎名恕吾粵連平州人拔貢名廷璜之長子也生而聰慧拔萃出宰吳中童子七歲隨任讀書十二歲諸經皆畢性喜考證自九歲知讀漢書尋及諸史至十四歲並通鑑瀏覽畧遍於歷朝官制地理尤窮究每與人言上下縱橫異同得失雖老宿莫能當也羣以神童目之讀書遇有疑義可以他書對求而得之者輒籤記之長樂溫伊初孝廉拔貢同年友也於童子極相期許且告之曰以子

之好史學不二十年卽爲萬季野錢竹汀不難矣童子亦自喜特甚居無何竟以咯血卒於上海縣署年僅十有八歲時道光十八年五月七日也所著已成者有後漢公卿表後漢書注彙誤西秦百官表北周公卿表五代地理考明說法考雜文十一首童子卒後拔貢編爲多識錄四卷刑以行未及成者尙有春秋地理表十六國百官表又雜考經史十餘篇拔貢嘗語伊初曰此兒夙解都非意計所及方其竊讀漢書尙畏吾見也每袖至僻處觀之至年十一二時試舉史漢中事詢之輒數無遺又云漢丞相有有傳者有無傳者若陶青劉舍僅見諸表者也再以兩漢官制詰之皆歷歷析其增損是時方爲後漢公卿表未成也吾嘗讀沈東甫新舊唐書合鈔序中有曰劉司徒者兒軌

指爲談詰之曰劉朂爲司空未爲司徒檢五代史本傳果然有友人以韓陵石示之謂係高歡破爾朱榮事竊語吾曰韓陵之戰乃破爾朱天光非榮也其於通鑑地理尤熟竊嘗論信陵君與諸侯兵追秦至函谷關以今地理言之當從某某進軍又作唐藩鎮論指陳地形悉合理勢云其咯血也以哭殤弟故天性孝友無纖毫忤色其卒也拔貢哭之慟曰吾不欲生矣余嘗得多識錄讀之考證精核體例嚴明童年得此尤難也其論荆軻云昔燕太子丹憤強秦之蠶食且恐及於燕邦於是遣荆軻刺秦王不克被殺綱目書之曰盜嗚呼此亦忠臣義士之所爲特未成其事耳烏得以盜稱之哉夫以秦王之暴人咸思剽之刃而食其肉苟軻得成其事將天下諸侯必且有畔秦而合縱者

雖燕國之祚未必不少延不意終不能成而燕遂以滅悲夫矧復書盜而重以挫英雄之志哉夫軻之事與張良博浪沙之事何異綱目不書盜誠以張良報仇於既亡之後其志易知荆軻行之於未亡之前其志難見也然其爲報仇一也此可謂不曲諒人心者矣雖然燕丹非知道者也既知秦之強而不能修德合縱以自存徒欲報其私忿快心於一劍之任其術固已疏矣而軻也特感其厚意出萬死不顧一生之計其死亦非合於道者也是以燕丹荆軻所爲但取其心而不取其事可也必欲書之以盜則是助秦而重其罪也亦可謂持平之論矣其所論說多類此經書自宋以前無梓木傳寫易訛故立石經以訂正之爲長久計也嘗考歷代所刊其書石之人刻經之數隸篆眞

草之跡誤於晉人之著錄見於近今之摹搨歷歷可指者自漢迄宋凡六刻而已一則漢之熹平也書之者爲蔡邕楊賜等經凡七周易尙書魯詩儀禮春秋經公羊傳論語書以八分二則魏之正始也書之者爲嵇康等經凡二尙書春秋左氏傳書以古文篆隸三體三則唐之開成也書之者鄭覃張參等經凡十二易書詩三禮三傳論語孝經爾雅書以眞楷四則蜀之廣政也經凡十三易書詩孝經爾雅三禮論語則蜀之毋昭裔張德鈞等所書其三傳孟子則宋之田況席益補立俱書以眞楷晁公武復附以古文尙書五則宋之嘉祐也經數不可考論語則仁宗御書易書詩春秋禮記則楊南仲所書俱眞篆二體六則宋之紹興也經凡七皆高宗御書易書詩左傳全帙禮記則節

書儒行經解學記大學中庸五篇皆小楷論語孟子則書以章草其餘如北魏之神龜則未刻而中寢晉之裴頌唐之天寶金之太學則徒有其說而無石刻之傳流大約爲之而未成者宋吳郡之石刻則取御書而翻之元汴梁之石刻則以前代所有而修之皆不足當刊刻之數也更如唐宋之御書孝經及諸家所書之易經大學等此又一支一節之散布並無當於石經之名者也

莊秀才名闕和字有鈞一字酉君少聰穎年十二三卽善騎能釋轡馳驟十五攻舉子業繼而窮經采漢唐以來諸家斷以己意著詩說又從事尙書以爲堯典授時非深通星厯家言不能得其旨禹貢治水非深諳水土之性不能師其意於是治天官書及中西算法博覽河渠輿地諸書

旁究風角占驗之術久之憮然曰象數絕學苟無師承勿能進也遂輟書未竟其業省試屢薦不售遂出遊以弟文和官廣東羅定州管遊粵又以族子振觀察河北延主懷山講席觀察沒秀才亦歸嘉慶二十三年九月一日卒春秋六十有九所著詩說四卷古本大學講義一卷中庸講義一卷雙州雜記一卷詩文若干卷

春秋上律天時具四時正閏餘備晦朔謹薄蝕治厯者求千載之日至恆推策而稽之然時世廣遠書策訛缺往往或合或不合至於窮經之士但循其年月考次前後足以除顛倒祛複重足矣而好學者亦復旁諏疇人以求其通此實事求是之誼也然治厯者不能盡求其合治經者亦不必過求其通則以課厯之疎密釋經之精粗義固不在

是晉書律厯志云漢末宋仲子集七厯以考春秋今其書已亡所謂七厯者蓋卽開元占經所載黃帝顓頊夏殷周魯加漢之三統爲七術也杜預作春秋長厯而實不諳厯法徒依經傳甲子推移前後遂有比年置閏一年再閏曠數歲無閏之訛不足憑也北周甄鸞著五經算術以周術推春秋厯法略舉數端曾不賅徧晉姜岌唐一行元郭守敬則各推春秋以自課所定之厯又在七術之外者國朝經學算學遠邁前代爲此學者約有六家其一則陳氏泗源也亦著春秋長厯所用古厯卽七術之殷厯大旨謂日食爲考應之原但食朔日名推驗相合則其餘疏失可以不問專以糾正杜氏於置閏及月之大小反覆推校意亦主於課厯二則顧氏震滄也所著春秋大事表有朔閏一

門及長屨拾遺亦如杜氏不諳屨算徒積累日月而已三則姚文僖尙書也所著邃雅堂學古錄亦有春秋朔閏表自以爲用顓頊屨推策其實卽殷屨也又不能守一家之法而仍依違出入於杜氏名規杜失而乖舛彌甚四則羅氏茗香也著有春秋朔閏異同徧列七屨條其異同以補宋仲子之書之亡其言春秋經傳之文或一事異時或一事異月或一事同日異月或一事日月並異或一事兩見於傳而日月互異或時日雖具而脫月名或日月初無異名及參以上下之月推勘遠近而不得其目且有別本異文如成十八年辛巳正義曰服虔作辛未之類蓋以時閏二千年書非金石轉流寫豈無失誤正義謂史文先闕而仲尼不改或仲尼備文而後人脫誤誠有然也蓋生數

千載之後而考數千載以上之日月異同可得而言也是非不可得而知也則亦存其可知者焉耳可謂篤學而屢守之者歟五則薛氏雯博也著有春秋經朔表以五經算術之法備推章部元餘闡餘中氣及每月大小餘而列之備檢核也二百四十二年依年排次省積算也其日食則旁采一行郭守敬所測而稽之考得失也經傳中干支有合有不合則一一著之而不加擬議闕疑也書凡四卷李申耆序之以爲絕長麻之迷惑攬諸家之指要於以方舟初學擁篲遺經拾遺補菽之雅庶無憾焉六則范氏景福也著有春秋上律表本名春秋朔閏日食表後請序於阮文達公易今名並屬焦里堂代爲序之

江都焦里堂孝廉之子名廷琥字虎玉讀書頗具慧心能

傳家學年十四隨里堂至杭州時阮文達督學浙江校士以天文算術別爲一科里堂襄校虎玉知平圓三角之法嘗步籌推算以驗得數百不失一云定香亭筆談詳言之虎玉所著有詩錄一卷文錄一卷附刊雕菰樓集後文錄中說經甚多茲酌錄之其仇逵同韻說曰焦氏筆乘云兔置仇與逵同韻蓋逵古一音求王粲從軍詩雞鳴達四境黍稷盈田疇節宅充鄙里士女滿莊尪尪卽逵九交之道也閩百詩以逵雖亦作尪不比尪有二音逵止音葵經文未嘗作尪豈容讀入尤韻琥案筆乘之說是也說文尪九逵道也重文逵或从壘从彡說文別無逵字而入尪下明逵尪本一字也三國志注引三蒼云尪古逵字爾雅釋文引字林云尪與逵同皆與說文合又文選蕪城賦注引韓

詩作中尫外傳云九交之道閻氏謂經文未嘗作尫而以
遶尫爲二字不知韓詩正作尫也易漸卦上九鴻漸于陸
宋儒改陸作遶解作雲路朱子仲其說謂遶儀同韻然路
字加雲起於詞章家考之爾雅以及說文諸釋字書無此
訓也其以此毒天下說日師彖傳以此毒天下王弼訓毒
爲役馬融訓毒爲洽干寶訓毒爲荼苦以易象求之干寶
之說是也毒之訓役無所證莊子人間世無門無毒釋文
云治與馬註同然考諸訓詁廣雅訓毒爲悲又訓毒爲安
說文訓毒爲厚於易象皆無所取按虞翻噬嗑六三注云
坎爲毒師下卦爲坎坎險爲二與五相應則順故雖五刑
之用斬肌刺體六軍之鋒殘破城邑而民亦從之毒卽坎
象爲行險從卽坤道爲順與上文行險而順正是一貫以

三說準之干說爲長惠氏從虞氏以坎爲毒又引馬傳訓毒爲治然說卦坎爲多眚毒卽眚非取於治也仲氏易從茶苦之訓而未釋其爲坎象則於干說終無所發明耳

鍾君保岐名懷揚州甘泉縣人先世業賈至君而貧君樂道知命不以貧賤自損其性情雖飽粥不繼不廢歌歌好著書而不與世爭名故世罕知者未弱冠補縣學生應省試十三次屢經困躓君惟自訟不知怨尤嘉慶甲子諸城劉侍郎督學江蘇重君學行舉優貢生明年卒春秋四十有五所著凡十三種曰春秋考異論三傳也曰說書解尙書也曰區別錄考訂毛詩之草木蟲魚也曰論語考古發魯論之疑滯也曰祭法解覈古祀典也曰周官識小經緯諸職而類釋之也曰讀選類述補文選注之不及也曰興

藝塾問答與子弟門人輩講說之所錄也曰漢儒考表兩漢經師也曰興塾筆記曰菽厓考古錄雜論經籍之說也菽厓君別字也曰覺菴日記甲寅乙卯間記日所行之事也曰鶴心館集詩古文詞也

詩益二十卷金壇劉子彥徵君著徵君名始興嘗應乾隆博學鴻詞科孫文定公所薦也此書爲詩本傳八詩次問二詩次補言一詩表二總辨一雜辨六其發前人所未發者爲詩次問及詩次補言其說小雅大雅謂自文王至宣王爲大白宣王至幽王爲小而以鹿鳴二十二詩間之大言其盛小言其衰以小先大實以小繼大按而核之確不可易蓋可信也惟辨小序有未當處則失之

顧君小謝名鳳毛字超宗小謝別字也揚州興化縣人父

九苞以通經名儒中乾隆辛丑科進士卒於天津超宗少
聰俊襁褓中祖母任口授唐詩率能成誦十一歲能解說
經書嘗作天文地理禮樂國璽諸論和鮑參軍行路難詩
時人奇之年十八應童子試解毛詩吁嗟乎騶虞反覆數
千言補儒學生甲辰南巡召試欽取二等自後披索經史
每夜寤默誦日所讀書或不記憶必起然燭熟之乃已不
好世俗名凡酬和詩詞拒之不應有所得不示人然問之
者隨舉一事一物皆能溯其源流及其說之異同歷歷辨
之無遺漏當是時大江南北經學競起鉤深索隱各自樹
立超宗於箋注義疏不爲異同惟以強記博覽堅守先儒
之學然尚有論斷未嘗不精覈簡要厭服衆心年二十七
卒時甫中副榜貢生傳聞闈中本擬前列第四人以對策

詆王肅及僞孔安國書傳而抑之亦命也夫超宗本學音韻律呂於嘉定錢教授塘撰有楚詞韻考入聲韻考毛詩韻考皆得錢君之指又撰毛詩集解童子求雨考三代田制考俱未成云

汪君晉蕃名光燦號芝泉以儀徵入學補廩膳生居江都其先本歙縣人父棣仕爲刑部郎政事文章卓然不朽世所稱對琴先生者也晉蕃爲刑部長子天性誠篤與人言不及俗事論學則娓娓不倦少處豐亨儉而好禮長處困乏不以升斗爲憂言笑之際不諳忌諱而未嘗侮人不矯情立厓岸而取予不苟治經深於尙書字櫛句解無滯義兼習毛詩禮記通其大旨尤好易彙集漢魏諸家考而釋之嘗與其友焦理堂論爻辰書云乾鑿度云乾貞子左行

坤貞未右行歲終次從于屯蒙屯爲陽貞于丑左行蒙爲
陰貞于寅右行歲終則從其次卦鄭氏以屯蒙需訟明之
然則以次者指序卦之次始乾坤次屯蒙次需訟以兩卦
主一歲又云三十二歲期而周六十四卦與卦氣值日迥
殊漢上不以需訟爲次而用謙睽升臨非鄭氏義也又難
云陽卦左行陰卦右行惟泰從正月左行至六月否從七
月左行至十二月泰否獨相隨左行明諸卦不然而惠氏
作爻辰圖乾坤諸卦皆左行與鄭氏不已異乎其好學深
思不逐口耳附和如此嘉慶丁卯卒年四十三卒時尙手
批大戴禮記文選不置後檢篋中得其手纂易稿二帙云
劉中受禮部名逢祿一字申甫江蘇武進人也年十八補
儒學生二十五選拔貢生三十二中舉人三十九始成進

士入翰林改官禮部在官歷十有二年不遷簿書期會敦
肅恪共如一日君貌不逾中人而美若冠玉容止溫肅吐
屬謙謹治經研精公羊爲專門名家之學探源董生發揮
何氏釋例三十篇以微言大義刺譏褒諱挹損之文辭洞
然推極屬詞比事之道又成箋說答難決獄等凡十一書
論者以爲自漢以來鮮有也中交張編修臬文共通虞氏
易爲六爻發揮旁通表虞氏易變動表卦象陰陽大義易
言補易象賦卦氣頌凡五卷又旁求之於書掇拾殘缺兼
蒐衆說爲古今文尙書集解三十卷又旁求之於詩病古
韻未有專書近人推演遞密而收字不全入聲分配無準
爲詩聲演二十七卷論者謂皆能創通奧域遂於大道勾
萌新意嗚達柯翰者也又以餘力及九章小學成書數卷

史記天官書及甘石星經爲之疏證成書數卷又欲仿經
典釋文之例存異文古訓爲五經旁異已就兩經而未成
其在官凡同列有疑不能決者爲引經義別白之旣而公
卿亦多就問所疑據經決事有董相風在官有庚辰大禮
記注長編十二卷春闈雜錄一卷東陵勘記圖說一卷石
渠禮論一卷論者謂皆言事翔實疏證確審云大抵所著
諸書宏而通達密而不縛其大宗也又選定八代文苑四
十卷唐詩選四十卷絕妙好詞二十卷詞雅四卷自著詩
文集八卷大都自著與所輯幾二百餘卷精力可謂過人
矣以道光九年八月十六日卒於京師春秋五十有六云
阮文達已輯之書惟經鄒百數卷未刻其書之義例詳闕
中陳恭甫左海文集中文燦自幼讀陳集恨未見之積疑

十年王子之夏晤晉江陳頌南侍御於京師侍御爲恭甫
編修入室弟子言道光壬辰癸丑間阮文達欲館侍御於
家俾校正經鄆叢稿侍御彼時初通籍牽於人事未果終
身恨之近詢之阮氏公子閏已散佚文燦嘗讀學經室再
續集言甘泉畢韞齋光琦乃蕭山湯敦甫相國督學時所
取佳士爲予門生門下士也歲乙未予入內閣每宿集賢
院在經筵中錄出詩書二經爲詩書古訓六卷尙欲校正
刪補蕭山言光琦可任之歸里晤言知其經學明敏閱三
年而校刻成書云是文達此書雖未盡付梓人已可卽此
窺見一斑矣此書粵東近重刊入粵雅堂叢書後之人或
卽此而補成十三經經鄆抑亦文達所企於後學也夫
京師萬柳堂者元平章廉文正希憲別業與趙文敏孟頫

宴集之地朱氏日下舊聞載之康熙時爲馮益都相國之
亦園鴻博名流多集於此今改拈花寺嘉慶十五六年阮
文達與朱野雲處士常遊此地補栽桃柳春秋吟詠道光
十八年文達出都僧請書元萬柳堂四字扁此京城東南
隅之萬柳堂也文達家揚州郡城北湖四十里僧度橋東
八里赤岸湖有珠湖草堂乃文達之祖琢菴將軍釣遊之
地嘉慶初文達之父湘圃大夫復購田莊文達嘗在此穫
稻捕魚嘉慶八年過此有八詠曰珠湖草堂曰三十六陂
亭曰湖光山色樓曰魚渠曰黃鳥隅曰龜蓮沼曰菱謂曰
射鴨船者卽此地也自後二三十年皆沒於洪湖下洩之
水樓莊多半傾圯道光十九年春文達在揚州以昔年水
深八九尺近年水尙五六尺宜築圍隄北渚乃擇田之低

者五百畝隄之而棄其太低者又慮與露筋祠召伯埭相對湖寬二十里宜多栽柳以禦夏秋水波隄外低田卽棄田也取江湖細柳二萬枝遍插之兼伐湖岸柳幹插之且舊莊本有老柳數百株隄內外每一佃漁亦各有老柳數十株乃於莊門前署曰萬柳堂文達以爲可以課稼觀魚返於先疇遠於城俗後之人庶以揚州之萬柳堂與京師之萬柳堂並爲儒林古蹟歟

甘泉黃右原孝廉爽江鄭堂藩弟子也以資爲刑部郎又得賜舉人少讀書爲舉業入安定書院會賓谷方伯異之曰爾勿爲時下學余薦老師宿儒一人爲爾師則鄭堂也右原卑禮厚幣延之館其家從之學右原質明敏又專誠受教四年鄭堂老病卒獨學又十餘年日事搜討從漢唐

以來各書中輯得高密遺書盈尺其六藝論周易注尙書注尙書大傳注毛詩譜箴膏肓釋廢疾發墨守喪服變除駁五經異義答臨孝存周禮難三禮目錄魯禘禘議論語注鄭志鄭記共若干卷已付梓人其尙書義問及緯書注未刻者尙十數帙其稿皆巾箱小本細書狹行朱墨紛雜其有他人已先輯者與自所輯者亦各有分別云阮文達嘗序之言高密起兩漢之末開六朝之先唐宋且勿論矣三禮之注毛詩之箋至今全備炳如日星高密本有不能禮堂寫定傳與其人之歎然片言隻字散在各書明目細心者尙可追尋皆袁紹逼會司馬屏廁之殘燼聖經賢傳之緒餘朱子得其一義卽可以正朝廷之大禮開禮經綱目之先路拾殘補逸可謂勤且博矣文達又云鄭堂爲余

早年益友嘉慶初年入京師余薦館王韓城相國家備查
列御製詩注之事終落魄歸揚州飢驅至嶺南余延總纂
廣東通志數年書成在粵曾自刻所補惠氏周易述余又
刻入臯清經解鄭堂又自刻漢學師承記鄭堂之師爲余
蕭客仲林仲林爲惠松厓徵君弟子四庫收其古經解鈎
沈曾館鄭堂家云

經學博采錄卷四終

經學博采錄卷五

南海桂文燦

孔幼髯名廣林字叢伯山東曲阜廩貢生署太常寺博士博雅好古治經專治鄭學著有周禮臆測七卷儀禮臆測十八卷吉凶服名用篇七卷禘祫觴解篇一卷明堂億一卷士冠禮箋一卷通德鄭氏遺書所見錄七十二卷延恩集一卷幼髯韻語錄存一卷外集一卷溫經樓游戲翰墨二十卷共一百三十二卷凡四十四萬五千餘言年二十六卽絕意進取閉門著述阮文達嘗謂海內治經之士無其專勤云年七十餘卒博士弼軒檢討之兄也檢討之學出於博士檢討弱冠成進士官翰林而博士僅攝世官檢討所著公羊通義大戴禮記補注禮學經學卮言著錄皇

清經解風行宇內所著詩聲類少廣正負術儀鄭堂詩文
彙亦久經刊行而博士所著書以卷帙浩繁屢刊不成惟
一二藏書之家存其彙本不絕如緘檢討之子名昭度字
元敬號荃溪早成進士入翰林歷官至貴州布政使屢掌
文衡愛士若渴博通經史能讀父書而博士之子不顯何
事事相殊若此豈檢討年僅三十五而博士壽考康彊此
獨擅五福之首故諸福爲之貶損歟然儒者苟盛業不朽
修短又所不計也陳恭甫五經異義疏證徵引博士之說
甚多蓋鄭氏遺書所見錄中語也今酌錄之以覘梗概五
經異義云王者一歲七祭天仲春后妃郊禘禘亦祭天也
博士日月令注云高辛氏之世元鳥遺卵娥簡狄吞之而
生契後王以爲媒官嘉祥而立其祠焉鄭君不言於郊則

是不以祿爲祭天矣焦喬答王衡云後王以爲媒官嘉祥
祀之以配帝謂之高祿蓋非鄭義異義公羊說樂萬舞以
鴻羽取其勁輕一舉千里毛詩說萬以翟羽韓詩說以夷
狄大鳥羽謹案詩云右手秉翟爾雅說翟鳥名雉屬也知
翟羽舞也博士曰詩毛傳云翟翟羽箋不異傳則鄭亦與
許君義同異義公羊說譏二名謂二字作名若魏曼多也
左氏說二名者楚公子棄疾弑其君卽位之後改爲熊居
是爲二名許慎謹案文武賢臣有散宜生蘇忿生則公羊
之說非也從左氏義博士曰案曲禮二名不偏諱鄭注引
檀弓言在不稱微言微不稱在釋之不云二名非禮則亦
從左氏義也異義卿得世不公羊穀梁說卿大夫世則權
并一姓妨塞賢路專政犯君專本誤故經譏周尹氏齊崔

氏也左氏說卿大夫得世祿不得世位父爲大夫死子得食其故采而有賢才則復升父故位故傳曰官有世功則有官族謹案易爻位三爲三公二爲卿大夫曰食舊德食舊德謂食父故祿也尙書古我先王暨乃祖乃父胥及逸勤予不敢動用非罰世選爾勞予不絕爾善論語曰興滅國繼絕世國謂諸侯世謂卿大夫詩云凡周之士不顯亦世孟子曰文王之治岐也仕者世祿知周制世祿也鄭駁異義引尙書世選爾勞又引詩刺幽王絕功臣之世博士曰詩不顯亦世箋云其臣有光明之德者亦得世世在位箴膏肓云公卿之世立大功德先王之命有所不絕者是鄭以世祿其常有功亦得世位與許微異王制正義云鄭不駁指世祿言左傳正義又引駁異義云云則據世位也

博士說經蓋多類此博士有從叔名繼涵字體生又字補
孟號莊谷別號南洲乾隆辛卯成進士官戶部主事早歲
告歸奉母著書於天文地志經學小學算學之書無不博
綜而詳考之所著有考工車度記補林氏考工記解勾股
粟米法釋數同度記各一卷水經釋地八卷紅欄書屋詩
文集六卷斲冰詞三卷遇罕傳之本必爲之校刊所刻微
波榭叢書有五經文字九經字樣算經十書杜預春秋長
厯春秋土地名趙汭春秋金鎖匙宋庠國語補音趙岐孟
子注休宿戴氏遺書共若干卷交遊徧天下尤與戴東原
庶常虛召弓翁覃溪兩學士相善講析考證不遺餘力惜
年四十五而卒壬子之秋予獲交博士從孫繡山舍人於
京師稔知博士之學並聞舍人云博士遺書彙本藏於家

漢陽葉澗臣舍人曾錄其副云繡山舍人名憲彝道光丁酉舉人官內閣中書以文學見稱於世嘗輯存闕里孔氏詩鈔曲阜詩鈔共若干卷刊之自著詩文彙共若干卷又以先儒陸道威嘗著論謂王者宜藏書於孔氏一代典章文籍錄送其貳凡書皆萃焉以爲斯文之宗主乾隆間詔修四庫全書分繕七部藏於文淵閣圓明園熱河盛京及揚州金山杭州諸處以嘉惠來學闕里關焉舍人因商之宗公於奎文閣製大廚七阮文達屬以角亢氏房等字編之將求海內經籍藏之闕里舍人又於京師公邸建致經堂先度之俟盈筐則載以歸云

浦城黃香厓徵君名蕙田道光己亥舉人何子貞師典試福建所取士也辛丑歲英吉利寇福州廈門當事者剿撫

失宜徵君徒步走京師伏闕上書論利害得詔回闕與大吏籌議詞氣激切爲時所嫉不竟其用而止咸豐改元之初舉孝廉方正加六品銜徵君品高學博目空一切真氣逼人見之者無不感泣予春夏間其同年林蕓溪博士屢爲予道之矣丑春徵君會試東京師特訪余於旅舍自後時相過從討論經義多聞所未聞所著有周易通史精義六卷集諸史之事以證周易也周禮類官精義六卷以類分官如理財用人之等集羣經注疏及衆說而發明之學庸考定二卷考定大學中庸章次也爾雅附編四卷自說文釋名廣雅玉篇字林以下諸書訓詁依義補編以附爾雅之後十三經音義補六卷補羣經之音義也十三經集字音釋四卷其體例略仿經典釋文凡異文異義異讀

異音皆詳釋之經字補韻一卷凡羣經之字韻書未收者
輯而存之雙聲韻母六卷盡收雙聲之字以三十六字母
爲綱而一母以四聲分之疊韻類音六卷凡疊韻二字今
韻未收者並收之六書補義一卷以說文爲綱而發明六
書之義易詩學記儒行老莊屈宋文選古音讀四卷考諸
書之古音也古韻音據一卷據音以定古韻也柘浦方言
雙聲疊韻一卷紀浦城方言之雙聲疊韻也字體點畫辨
微二卷據說文以辨正字體也反切指迷一卷指明反切
之學也音字考正四卷考正正字通也聯字考義補一卷
徵君鄉人林鑑塘春浦著有聯字考義一書諸聯字如脂
膏囊橐之類略有遺漏特著此書以補之所著共五十六
卷其說經也專尙新穎自謂近著各書無一語取諸人云

林薌溪又言其鄉侯官林樾亭孝廉喬蔭著有三禮陳數
求義十二卷爲陳氏禮書之支流其論田制辨正沈冠雲
周官滌田考之說最爲精確伊弟香海編修樹蕃幼有神
童之目甫弱冠入翰林典試浙江所取多實學之上說經
之文不多而祭儀禘祫等篇最爲精妙詩才尤超越惜不
永年卒時僅三十有二侯官又有林鈍邨孝廉一桂乾隆
己亥舉人少家貧以香照讀學竟成博極羣書著有周禮
私記五十卷多采近儒之說極爲賅洽惜少折衷又著有
周禮簡明經說四卷讀書劄記十卷藏於家陳恭甫編修
稱畏友焉侯官又有鄭茂才天錡乾隆中人也賦性絕人
過目之書卷頁次第一字不爽無書不讀精於天文算術
輿地之學尤熟本朝掌故時人號曰書籠說經之文甚多

考證精確惜皆散佚又閩縣有薩檀河大令玉衡由舉人
官知縣博雅好古著有檀弓小記檀河日鈔共若干卷並
厄於火又注族祖薩雁門詩集刊行亦工詩雄博與梅邨
竹垞相似又甌甯有萬虞臣舍人世美由進士官中書精
熟十三經義疏尤長於天文算術所著有歲躔考二卷陳
恭甫五經異義疏證多采之又興化有王懷佩孝廉捷南
嘉慶甲子舉人就職國子監學正博通羣經尤精詩禮所
著經說未梓咸豐五年在籍團練剿匪遇害奉旨照陣亡
賜卹又閩縣有何岐海孝廉治運嘉慶丁卯舉人家饒於
資藏書至七萬餘卷日以經籍自娛書史之外別無嗜好
著有何氏學四卷札記體例語多新穎已付梓人又爲公
羊春秋之學惜未成書又福安有王教諭錫齡弱冠舉於

鄉治春秋著有傳異同考二卷又惠安有陳念庭主事
金城由道光壬午舉人官兵部治虞氏易著書尙未梓云
錢塘嚴厚民上舍杰阮文達授經弟子也在吾粵編刻皇
清經解一千四百卷體例舛誤如翟晴江教授四書考異
原本總考條考各三十六卷上舍刪去總考但刻條考任
幼植侍御弁服釋例原本卷首有天子諸侯卿大夫士弁
服表一卷上舍亦刪去不刻至所編經義叢鈔自署己名
倘得近人說經之文零篇剩簡統爲編輯畧如總集自是
大觀乃編詰經精舍學海堂文集二書已覺未當然猶曰
總集也若洪筠軒州倅讀書叢錄禮經宮室問答孔子三
朝記注三書何爲概行編收耶尤可異者顧震滄祭酒春
秋大事表書以表名表自可貴乃上舍盡刪其表但存表

叙論說又若各書原序總目皆當日著書之綱維守先待
後自不可缺乃上舍亦刪去之凡若此類更僕未終世多
非之洵公論也然上舍以校書精審爲文達所重擘經室
集題嚴厚民書福樓詩云嚴子精校讐館我日最長校經
校文選十目始一行自注云世人每矜一目十行之才余
陋之夫必十目一行始是真能讀書者也聞文達此言知
讀書固在精矣

大戴禮記解詁十三卷目錄一卷南城王君實齋聘珍著
其言曰大戴與小戴同受業於后倉各取孔壁古文記非
小戴刪大戴馬融足小戴也禮察保傳語及秦亡乃孔襄
等所合藏是賈誼有取於古記非古記采及新書也三朝
記曾子乃劉氏分屬九流非大戴所哀集也阮文達嘗從

翁覃溪學士得識王君文達稱其厚重誠篤有古人風無南人浮競之習延教家塾弟子者有年王君書成屬序於文達文達謂其校經文專守古本爲家法有愆於近日諸儒妄據他書徑改經文之失其爲解詁義精語潔恪守漢法多所發明爲孔搆約諸家所未及能使三千年孔壁古文無隱滯之義無虛造之文用力勤而爲功鉅云文達又屬王君別爲大戴記作釋文數卷未知其成書否也

歙縣程春海侍郎凌次仲進士授經弟子也侍郎名恩澤字雲芬自少力學博綜經史後從進士遊及其闕奧進士嘗曰天人並至博而能精將來所成者大也嘉慶甲子舉於鄉辛未成進士由翰林官至戶部侍郎嘗繼父蘭翹學士在南書房行走又在上書房行走課惠親王學侍郎學

識超越時俗天算地志六書訓詁金石皆精究之尤工篆
法精許氏學官貴州學政時嘗勸育粟蠶士民利之又重
刻岳珂五經以訓士及奉命刻春秋左氏傳推本賈服不
專守杜氏一家之學平日好士凡士有技若己有之典試
廣東期取實學之士知曾勉士名必欲得之勉士丁憂侍
郎不知也書榜大失望然所得士如吾師陳蘭浦先生及
梁玉臣舍人儀墨農溫伊初兩孝廉輩皆績學之士出關
後與學海堂學長曾勉士吳石華等遊白雲山名士會者
數十人有蒲調賞秋之圖所著述惟國策人名考二十卷
已寫定本吾師何子貞先生侍郎督學湖南所取士也又
刻程侍郎遺集十卷侍郎嘗謂近人治算由九章以通四
元可謂發明絕學而儀器則罕有傳者乃與鄭君復光有

修復古儀器之約又嘗深究開元占經謂道光十五年木
火同度常有火災又謂道光二十餘年後兵革頻仍每勸
人讀古兵書其言皆驗所著國策地名考如謂孟津在河
北非今孟津縣亦非古河陽縣蒲反非舜都乃衛蒲邑以
嘗入秦仍歸故謂之蒲反又嘗著肇十有二州說謂堯典
肇十有二州馬鄭注及晉書地理志皆以在禹功後漢書
地理志谷永傳皇甫謐帝王世紀宋書州郡志皆以爲在
禹功前案下潞川之文則在禹功前之說是也禹貢云九
川滌源九澤既陂皋陶謨云予決九川距四海濬汭滄距
川蓋禹功告成之後其利可百世豈甫疏鑿卽又有濬通
之役耶漢書地理志云堯遭洪水懷山襄陵天下分絕爲
十二州使禹治之水土既平更制九州帝王世紀云堯遭

洪水分爲十二州今虞書是也及禹平水土還爲九州今禹貢是也其言甚晰足正馬鄭之誤論者咸稱精確云夫網羅六藝貫典百家名位巍然說士如肉而天下士皆悅之者道光以來惟阮文達及侍郎而已文達以文章經術受三朝殊遇久歷封圻入躋宰輔所著各書手付剞劂年踰耄耋神明不衰而侍郎雖頻膺簡命嚮用甫殷未行其志所著諸書未付梓人年未中壽遽歸道山子貞先生謂信屈殊勢豐嗇殊形修短異數天實使然

文探

則謂此天

下文學之興廢國家人才之盛衰所關係也使事事與文達相埒則道光中葉而後文達雖南歸而京師之中儒林祭酒侍郎任之將見文學日興人才日盛已何至不悅學如是其極哉

程春海侍郎有經學老友二人曰狄君惺垣俞君理初狄君名子奇又字叔穎江蘇溧陽縣人也於孔孟之書面壁研精二十餘年著有經學質疑孔子編年孟子編年四書釋地辨疑鄉黨圖考辨疑共若干卷所說皆融漢宋而一之志誠遠且大矣經學質疑乃論語大學中庸孟子四種本名四書質疑阮文達以四書名目後起不古命易今名其書用心腕篤網羅富有商榷集注意句心氣和平出詞簡要於朱子不爲佞臣不爲畔臣而當爲功臣雖稍異焉庸何傷至如鄉黨享禮非虛字卽儀禮禮賓一節在享後私覲前憲問章寡盪舟非罔水行舟據左傳齊桓蕩舟證竹書戰灘覆舟事所云春舊穀出新粒而計千乘之數斷包馬兩家義皆非別援稍人邱乘謂乘宜出十六井又用

司馬法甲士十人步卒二十人之說使周禮孟子可相通
尤爲發從來未發之覆孔子編年大率以史記爲據顧孔
子世家互異卽以史記正之世家云孔子之去魯凡十四
歲而反乎魯計自哀公十一年逆數至定公十三年爲十
四歲世家云定十四年去魯則爲十三歲魯世家及十二
諸侯年表又云定十二年去魯則爲十五歲皆與十四歲
不符衛世家孔子至衛在靈公三十八年當魯定公十三
年正與去魯年合狄君特以去魯繫之定十四年爲自來
考先聖事蹟者所未道至若陳世家孔子至陳在愨公六
年當魯定公十四年宋世家孔子過宋在景公二十五年
當魯哀公三年孔子世家並繫之定十五年亦彼此互異
凡此皆一一訂正之孟子爲鄒人卽春秋之邾國譚貞默

編年略誤以爲卽孔子陬邑司馬貞索隱孟子卒於周赧王二十六年壬申年八十四逆推生當在烈王四年己酉乃索隱誤謂在定王三十一年或又作三十七年竹書紀年梁惠王後元十三年十月齊城薛是年爲周顯王四十六年乃通鑑前編誤謂在赧王元年竹書紀年孟子至梁在惠王五十三年實後元末年年已五十餘故王以叟稱之從其實也乃史誤謂惠王三十五年孟子卽至梁在梁凡十八年國策齊宣王伐燕在赧王元年黃氏日鈔乃誤謂伐燕有二前伐燕爲宣王後伐燕爲閔王集注又謂齊破燕後二年燕始叛或因以爲孟子後事閔王之證凡此諸誤孟子編年皆一一釐正之春海侍郎序謂闕諸謬說歸之一是亞聖之生平如燭照數計可謂有功於聖賢之

門洵非虛語也侍郎所著戰國策地名考狄君嘗爲之編
訂則狄君亦深於輿地之學已俞君名正燮安徽黟縣人
也負絕人資篤好讀書過目大半成誦所舉地名人名見
某冊某篇多不爽搖筆灑灑數千萬言某可據不可據某
宜稟宜辭輒令人人信服所著類彙三十餘卷宏覽博辨
援筆立就退檢諸篋無一誤者侍郎序之謂吾里說經鏗
鏗尤善治史部則有吾師凌次仲先生與師角立不倚則
有吾友俞理初理初受性精敏寢饋經史旁通諸子百家
九流尤善言天象暨厯數以爲泰西法積精然豈三代秦
漢人所豫解以某時厯衡某時法是非區別則三代秦漢
人不能委其過尤善言地輿說方域以爲中外同軌不道
險今昔異履不詳憲惟殊方遐國人所忽必當察察則萬

一可據爲攻戰之導也至於掌故之鉅名物之細聲詰之雅七緯三式釋典道藏素靈之奧景教之歧凡諸儒撝舌方皇者稱引首首如肉貫鼎則又非恆量所能測識者也其見所推重如此癸巳君應禮部試受知於王菽原主政藻薦而未售主政急索君著述約同門孔繼勳熾庭邱景湘鏡泉吳林光薌冷醮金棗之釐其校正者爲十五卷題曰癸巳類彙明輯成於癸巳也餘爲癸巳續彙主政蓋欲以身後大名償世俗一第之榮也用心良苦聞者歎感云詩毛氏傳疏三十卷陳碩甫明經著明經名奘江蘇長洲縣人段茂堂大令入室弟子也大令嘗訂毛詩故訓傳三十卷經傳別行讀者便之明經閉戶殫精三十餘年撰成此疏可謂篤守師訓矣此書剖析同異訂證闕說有功毛

氏不淺葛覃傳父母在以下九字爲箋語竄入引泉水箋
爲證與我行其野篇宣王之末以下十九字爲傳誤入箋
者皆確不可易毛於言告言歸下旣云婦人謂嫁日歸於
此則第訓甯爲安蓋歸甯卽序之歸安父母謂已嫁而可
以安其父母之心卽所謂無父母遺懼也潛夫論斷訟篇
云不枉行以遺憂故美歸甯之志一許不改蓋所以長真
潔而甯父母也此正足以發明序傳之義又如以煩擱解
生民之蹂黍里旅證公劉之廬旅皆確有依據而以爾雅
之不遜不蹟不徹爲一句以釋日月沔水十月之交三詩
尤爲精絕其他多以經證經以傳證傳精心孤詣冰解的
破云明經又嘗重刊郝蘭皋戶部爾雅義疏校刊金誠齋
明經求古錄胡竹邨農部儀禮義疏各若干卷明經有弟

子曰馬沅林劍道光甲辰舉人傳明經之學並深天文算
術云

李緒子庶常滿平吾粵嘉應州人也生而岐異甫學語母
楊太宜人就懷中口授唐絕輒能記誦年十九補弟子員
嘉慶戊午舉於鄉乙丑成進士選庶吉士改授江蘇昭文
縣知縣昭文固有漕舊爲土棍包攬索賄於官曰漕規庶
常嚴革之首發難焉先是昭文積有虧擲庶常接代爲人
所愚因是落職繫外臺獄者八年丁丑恩赦改諭城旦出
獄庚辰限滿南歸時阮文達公總督兩粵延庶常授公子
經會開學海堂以課士屬庶常定甲乙焉庶常深於經學
著有易刊誤二卷毛詩細義二十四卷精熟文選著文選
異義二卷亦工詩賦著有讀杜韓筆記二卷著花菴集八

卷吳中集入卷南歸集四卷續集四卷賦二卷通青鳥家
言著有堪輿六家選注入卷細義及詩集並刊行細義又
列入皇清經解道光壬寅余獲交庶常之子子貫茂才通
言於羊城言庶常所著尙有小學樗言二卷說文羣經古
字四卷藏於家樗言二卷順德梁章冉學博嘗錄副藏之
云文選典引本蔡中郎注今其如台而獨闕也尤氏本汲
古閣本注尙書曰夏罪其如台孔安國曰台我也庶常有
詩云諸儒不省太常儀晚出羣將孔傳疑典引先存安國
學中郎注襄幾人知竟欲爲僞孔傳翻案惟南宋贛州本
尙書曰上有善曰二字是引尙書及孔傳仍是李注非蔡
注也庶常之詩直戲言耳嘉應又有溫魯菴州丞者名定
瀾康熙壬午舉人官安徽亳州州同爲音韻之學著有韻

學經緯十卷阮文達公嘗序之

阮文達曰六藝論云穀梁子善於經蓋以其親授微言於子夏最近於孔子也公羊與穀梁同師子夏而鄭氏起廢疾則以穀梁爲近孔子穀梁爲六國時人然則善經近聖四字固此傳之確評矣世之治經者多治左氏公羊於穀梁慢之故余整齊百家爲皇清經解千四百卷左氏公羊皆有專家穀梁無之心每欲然云

文燦

少時聞鎮江有柳

賓叔氏者專爲穀梁春秋之學著穀梁大義述一書大類凡七第一述日月例第二述禮第三述異文第四述古訓第五述師說第六述經師第七述長編從陳蘭甫先生處得柳氏郵寄先刻之本讀之纖毫畢具巨細無遺於此經大義歎觀止矣道光庚戌遊京師南歸至揚州先生以省

墓將返金陵命

文燦

訪柳氏於其里時柳氏尙在揚州未

之晤也比咸豐壬子

文燦

再遊京師而柳氏特枉駕來欣

仰德容精神靜穆言詞謙遜宜其所成者大也壬子之夏

柳氏南歸至癸丑春鎮江城陷其所著書藏之名山不可

知也灰飛烟滅亦不可知也阮文達序其書有亟望禮堂

寫定授之梓人補學海之缺文與海內學者共之之語異

日倘得其全帙續刊於皇清經解一千四百餘卷之後不

甚幸歟柳氏名興恩道光十二年舉人候選儒學教職

吾粵先達通曉九數者其一爲陳觀樓觀察其一爲勞莪

野孝廉此後蓋無聞焉近時深於算學者以

文燦

所聞以

梁君南溟爲最君名漢鵬番禺新造鄉人也少讀經書通

大義酷好算書凡九章變化中西異同爛熟於胸自道光

中葉以來凡欲學算者無不惟君是問君又於陶鑄五金之法辨別鳥獸之性最爲精審粵人謂銅鐵之精者爲熟銅熟鐵粗者爲生銅生鐵二者貴賤迥殊而不可變易君有法能使生者爲熟爐戶得之利市三倍君又嘗謂食色生死之欲鳥獸與人同有之然鳥獸之語絕少蓋惟食色生死數者耳嘗卽其音以求之蓋可信也君又善鑄西洋鎗礮並合造西洋火藥嘗謂西洋火藥別無巧妙惟提硝極淨故能致遠云道光辛丑間英吉利犯邊沿海七省萬里設備奉詔廣求奇材異能之士以備錄用粵督高平祁恭恪公開幕府以禮招君教標下將士以陶鑄鎗礮合造火藥之法奏請給六品銜己酉之夏文燦識君於陳蘭甫先生座中極欲問算於君因事中止迨文燦遊學南歸而

君卒矣君卒後陳先生欲輯其遺稿編爲梁南溟算學若干卷其子珍之不肯傳君嘗著夕桀解云周禮九數始方田終勾股法已備矣至漢而復有重差夕桀之名何也夫重差所以濟勾股之窮也蓋於高深廣遠無可比例以求者則前後立表退而相望兩退相差因而比較此重差之名所由立而其用實不離乎勾股故曰以濟勾股之窮也其言夕桀何也或以爲互乘之譌不知互乘之法因其開除不受不能成算必累乘互用以濟其分故曰互乘夫累乘互用則差分方程諸法皆有之其不足當九數之一斷然矣竊謂夕桀者義無可訓以形求之蓋勾股之譌也勾股居九數之末其法最難其用最廣故以是終焉分言之則重差勾股之用也合言之則重差卽勾股也凡有數卽

有象象不離乎數萬象起於方圓而圓出於方方出於矩
矩出於勾股故偃矩以望高覆矩以測深卧矩以知遠其
有高深廣遠之可比例者以勾股測之其無高深廣遠之
可比例者以重差測之測望之法至此而備勾股之用至
此而極故曰重差勾股并其法之極備而爲名也考陸氏
釋文旣爲夕桀作音則魯魚亥豕之譌己在唐以前矣

近時鄉試會試皆以古義獲雋者以

文燦

所聞得一人焉

曰周秩卿進士進士初名以清更名寅清吾粵順德人也
爲諸生爲總督阮文達公所賞識乙未恩科順天鄉試欽
命四書首題爲未若窮而樂富而好禮者也進士據皇氏
疏本作未若貧而樂道爲說見重主司中舉人甲辰會試
副總裁爲徐侍郎士芬次場書藝以同律度量衡爲題進

禮記注疏卷之九
士本鄭注同爲陰律律爲陽律爲說獲傳進士深於經學
嘗著孝經古義考有云以順天下鄭云至德以教之要道
以化之孔經作訓傳教也寅清按順與訓通今文尙書克
明訓德訓順也洪範于帝其訓世家訓作順索隱云史記
馴字徐廣皆讀曰訓訓順也殷本紀五品不訓漢書王莽
傳五品乃訓後漢書周舉傳帝下策問曰五品不訓劉愷
傳調訓五品謝夷吾傳五品咸訓於嘉時周官地官注教
所以親百姓訓五品並訓爲順禮記順非而釋言其所訓
說也大戴記小辨篇士學順順卽訓之假借順又兼有化
誼月令順彼遠方鄭云順猶服也左傳慈和徧服爲順王
肅私定家語注云未有順事且陳道德以化之以無刑殺
而後爲順故鄭又云要道以化之也攷孝經順字凡十見

孝經緯云孔子志在春秋行在孝經春秋左傳之言順者實與孝經爲表裏順實聖經中要字鄭注得其真孔傳從其借耳形於四海釋文引鄭注形見孔傳作刑訓爲法按形刑古互用左傳形民之力家語正論引作刑易其形渥假爲刑罰字形與刑誼得兩通然考孝經序云庶幾廣愛形於四海已明用鄭說說文形从彡井聲有文可見故从彡與下云光於四海同誼作刑究不如作形之確石臺本唐石經岳本皆作刑釋文亦訛作刑見蓋因思齊有刑于之文據毛詩而誤改爾不敢失于臣妾之心孔傳云賤不失禮毛西河孝經問謂今文不敢失于臣妾古文不敢侮于臣妾正義引劉光伯云失謂不得其意又云臣妾營事產業宜須得其心力故云不敢失是光伯講今文而不講

古文不遵孔而遵鄭按隋書光伯本傳自爲狀曰周禮禮
記毛詩尚書公羊左傳孝經論語孔鄭王何服虔等注凡
十三經義有精粗並堪講授是光伯講孝經孔鄭兼講經
籍志所稱王邵訪得孔傳河間劉光伯爲之敘講者謂講
孔傳自光伯始倡而非謂光伯必不從鄭今按孔氏有賤
不失禮則其敬貴必矣之文而鄭君無注經又同作不敢
失惟宋本古文孝經作不敢侮西河所云光伯不遵孔而
遵鄭誤也而罪莫大乎不孝鄭君無注正義引舊注及謝
安袁宏王獻之殷仲文等皆以不孝之罪聖人惡之去在
三千條外臧氏鏞曰周禮大司徒不孝之刑釋曰孝經不
孝不在三千者深塞逆源此乃禮之通教賈氏知孝經不
在三千者據鄭注孝經言也與正義所引舊注合故云舊

注卽鄭解按正義凡五引舊注如兄事五更退思補過因嚴以致敬三條與釋文合至敬一人而千萬人悅及此條未可定爲鄭本鄭君訓詁六經各如本文不拘一律詩中心藏之箋云臧善也我心善此君子表記事君欲諫不欲陳引詩中心藏之鄭注陳謂言其過於外也正義引皇侃云人臣中心包藏君惡釋文藏如字鄭解詩作臧云善也禮記舊本作藏鄭讀如字故無臧善之訓臧藏各有義鄭君各如本文未嘗以己意竄改安得謂鄭注所無遊以舊注爲附會乎卽如資于事父以事君孔傳訓資爲取而鄭注表記考工記並云資取也鄭君論語注曰同志爲友見於易蹇卦正義周禮司諫疏文選古今十九首注今見孔傳士有爭友注中而鄭不引公羊疏又謂出蒼頡篇正義

稱蒼頡篇謂患爲禍孔鄭韋王之學並引爲訓而此不之及使謂鄭注他書未必盡舉以釋孝經終嫌強合况又據賈氏之言定爲鄭注安在其可據也退思補過正義引舊注韋昭云退居私室則思補其身過臧氏鏞日上章進退可度釋文引鄭注難進而盡忠易退而補過可證此注爲補其身過孔傳則云獻可替否以補主過按二說不同誼並相通左傳宣公十二年士貞子云進思盡忠退思補過社稷之衛也下云其敗也如日月之食則以過爲身過卽鄭注所本也史記管晏列傳云至其諫說犯君之顏所謂進思盡忠退思補過者歟則以過爲主過卽孔傳所本也然案下云匡救其惡孔傳當不如鄭注之善若以過爲主過則以下義爲重進思盡忠亦以鄭注死君之難爲確如

孔傳說亦與將順其美同義其他經說多類此

經學博采錄卷五終